



Inatsisartunut ilaasortaq Michael Rosing, Demokraatit  
/Maani

**Akuersissuteqartarnermut inatsimmut aammalu unioqqutitsilluni imaatigut angalasarnermut tunngatillugu apeqquut nr. 2010-126-mut akissuteqaat**

Inatsisartut suleriaasianni § 36, imm. 1 malillugu akuersissuteqartarnermut inatsimmik suliniuteqarneq sumut killinera apeqquteqaatigaat. Aammalu apeqqutigineqarpoq Naalakkersuisut qanoq pilersaaruteqarnersut unioqqutitsilluni imaatigut angalasarneq unitsinniarlu?

23. juni 2010  
Sagsnr. 2010-030857  
Dok. Nr. 399373

Postboks 269  
3900 Nuuk  
Tlf. (+299) 34 50 00  
Fax (+299) 32 47 04  
E-mail: apnn@nanoq.gl  
www.nanoq.gl

**Apeqquut:**

**1. Kuunnik eqaloqarfinnik atuisinnaanermut piginnaatitsinissamik suliaq sumut killippa tamatumalu atuutsinneqalernissaata qaugu pinissaa naatsorsuutigineqarsinnaava?**

**AKISSUTEQAAT:** Kuunnik eqaloqarfinnik atuisinnaanermut piginnaatitsinissamik suliap piareersarneqarnera aallarteruttorpoq inatsisissatullu missingiut oqaaseqaasiartalik qanittukkut tusarniutigineqassasoq naatsorsuutigineqarluni. Tamanna pereerpat siunertaavooq, 2011-mi ukiakkut Inatsisartut katersunnerannu inatsisissatut siunnersuutip saqqummiunneqarnissaa. Neriuitigineqarpoq, atuisinnaanermut piginnaatitsinissap 2011-p aasaani atuutsinneqalernissaata, tassanili apeqqutaassaaq aamma kommunit suliamut qanoq peqataanersut, tassami aaqqiinermi tamatumani aqutsinikkut pingaru-tilimmik inissismasussaammata. 2011-mi majip qaammataani inatsisissap atuutilernissaa naatsorsuutigineqarpoq.

**2. Unioqqutitsilluni immakkut angallannerup ajornartorsiutanera qaangerniarlugu Naalakkersuisut qanoq iliuuseqalersaarp?**

**AKISSUTEQAAT:** Imarsiornermut tunngasut suli nunatsinnut nuunneqanngillat taamaalillutilu Naalagaaffeqatigiinnerup iluanut tunngasuulluni, taamaammallu aamma Naalakkersuisut unioqqutitsilluni immakkut angallannermut pineqaatissiissarnissamik aalajangersaasinnaanatik. Nalunaarutiginninnissamut tunngavissalimmik taamatut pisoqartillugu tamakku politiinut nalunaarutigineqartassapput, nalunaarutigineqartut tassanngaanniit sularineqassallutik.

Naalakkersuisut isumaqarput, umiatsianik akuerisaanngitsunik angallattoqartarneranut patsisaasoq pingarneq tassaasoq, ullumikkut umiatsianut ilaasoqarsinnaasunut akuersissuteqartarnermi piumasaqaatit sakkortuallaarneri. Taamaattumik tamanna tunngavigalugu suleqatigiissitaliortoqarpoq kalaallinik qallunaanillu oqartussaatitanik inuttaqartumik, umiatsianut aaqqaneq marluk tikillugit ilaasoqarsinnaasunut maleruagassat qanoq iliorluni pisariillisarneqarsinnaanerannut, misissuisussanik. Tamannalu ilaatigut pisinnaavoq imaani angallannermut maleruagassaliornikkut, tassa imatut paasillugu piumasaqaatit qallunaaniit appasinnerutinnagit, taamaattorli nunami maani imaani angallannikkut pissutsinut naleqqussarlugit.

Imaani angallannikkut sillimaniarnerup pitsanngorsaaviginissaa eqqarsaatigalugu, uanga isumaga unaavoq, tassuuna paasisitsiniaanerup nukittorsaaviginissaa pisariaqassasoq. Tamanna pisinnaavoq "Imaani angallannikkut isumannaatsuutsineq" pillugu paasisitsiniaanerup ingerlateqqinnejnareratigut, aammalu tv-ikkut radiokkullu takusassiatigut kiisalu meeqqat atuarfiini atuartitsissutissanik pilersaarusiornikkut.

Aammattaaq imaatigut angalasinnaanermut akuersisummik allagartamik atuutsitsisinnaalernissaq takorloopara. Imaatigut angalasinnaanermut akuersisummik allagartaqalersinnaaneq pillugu isumassarsiaq ukioq manna Inatsisartut upernaakkut ataatsimiinneranni (imm. 46) oqaluuserineqarpoq. Imaatigut angalasinnaanermut akuersisummik allagartamik taamaattumik atuilernissaq Inatsisartunit ilassilluarneqarpoq. Taamaattumik Ineqarnermut, Attaveqarnermut Angallannermullu Naalakkersuisoqarfiup, imaatigut angalasinnaanermut akuersisummut allagartaq taamaattoq qanoq ilusilorsorneqarsinnaallunilu atuutsinneqalersinnaanersoq, misissorusuppa.

Suliniuitit tamakkua imaani angallannikkut sillimaniarnermut pitsanngorsaaqataajumaartut, neriuutigaara.

Inussiarnersumik inuulluaqqusilluta

Ane Hansen  
Aalisarnermut, Piniarnermut Nunalerinermullu Naalakkersuisoq